



Miércoles, 14 d' agostu de 2018

El Conseyu de Gobiernu concede la Medaya d'Oru d'Asturies a Vicente Álvarez Areces, a títulu póstumu, y a la Brigada Central de Salvamentu Mineru

- La presidenta del Centru Syperior d'Investigaciones Científiques, Rosa Menéndez; la escultora María Jesús Rodríguez y la Rede de Cases d'Acoyida reciben les distinciones de plata
-
- Los actos de celebración del Día d'Asturies van tener llugar esti añu nel conceyu de Cabrales
-
- L'Executivu noma secretariu xeneral técticu de la Conseyería d'Infraestructures, Mediu Ambiente y Cambéu Climáticu a Francisco Javier Álvarez

El Conseyu de Gobiernu acordó güei conceder esti añu cinco Medayes d'Asturies: dos na so categoría d'oru a Vicente Álvarez Areces –a títulu póstumu- y a la Brigada Central de Salvamentu Mineru, y el restu, de plata, a la presidenta del Centru Superior d'Investigaciones Científiques (CSIC), Rosa Menéndez, a la escultora María Jesús Rodríguez, y a la Rede de Cases d'Acoyida del Principáu.

La Medaya d'Asturies acútase, según la Llei Reguladora d'Honores y Distinciones del Principáu, pa premiar méritos verdaderamente singulares que se dan en persones o instituciones d'importancia y trascendencia pa los intereses xenerales de la comunidá autónoma que los fai acreedores d'esta reconocencia pública.

Lo que sigue ye una curtia reseña de les persones ya instituciones distingües.



- **Vicente Alberto Álvarez Areces**

La concesión de la Medaya d'Oru a Vicente Alberto Álvarez Areces, fináu'l pasáu 17 de xineru, reconoz “el so compromisu cola llibertá y la democracia, la so impecable trayectoria política y la so fundamental aportación pal desenvolvimientu y la modernización d'Asturies”.

Nació en Xixón el 4 d'agostu de 1943, llicenciáu en Matemátiques y peritu industrial, na so mocedá compaxinó la docencia cola política y participó viviegamente en distintos movimientos estudiantiles. Venceyáu primeramente al Partíu Comunista d'España (PCE), abandonó la formación en 1978 y darréu xunióse al PSOE, al que consagró la mayor parte de la so trayectoria política.

Foi escoyíu alcalde de Xixón nos comicios de 1987, 1991 y 1995 y nos sos doe años de mandatu propúnxose modernizar la ciudá, abríla al mar cola creación de les playes de Poniente y L'Arbeyal, impulsar el so desenvolvimientu urbanísticu, fomentar l'actividá cultural, recuperar l'antiguu puertu y reformar numerosos enclaves como'l cuetu de Santa Catalina, los parques del Rinconín y La Providencia o la sienda del Cervigón.

Tres la so etapa municipal, el 20 de xunetu de 1999 foi investíu presidente del Principáu, cargu qu'ocupó hasta 2011. Nes sos trés llexislatures la comunidá recibió'l trespasu de les competencies n'árees tan relevantes como Educación, Sanidá y Xusticia. Amás, abordáronse proyectos d'importancia estratéxica, como'l desenvolvimientu de los campus d'Uviéu, Xixón y Mieres; la construcción del nuevu Hospital Universitariu Central d'Asturies (Huca), n'Uviéu, y del Vital Álvarez Buylla, en Mieres; l'ampliación del Muséu del Belles Artes y del puertu d'El Musel, la creación del Centru Niemeyer n'Avilés y la puesta en marcha de Llaboral Ciudá de la Cultura en Xixón. Cola so presidencia inauguráronse tamién el Muséu del Xurásicu (Colunga), el centru d'interpretación de Tito Bustillo (Ribeseya) y el Parador de Courias (Cangas), ente otros equipamientos.

Políticu con una enorme capacidá de trabayu, Álvarez Areces favoreció'l progresu de Xixón como alcalde y d'Asturies dende la Presidencia de la comunidá. Foi, amás, un exemplu d'entrega y serviciu públicu p'avanzar escontra una sociedá más xusta y solidaria, valores qu'exerció tamién como senador hasta'l so fallecimientu.

- **Brigada Central de Salvamentu Mineru**

La Brigada Central de Salvamentu Mineru foi distinguida cola Medaya d'Oru d'Asturies en reconocimientu a les sos más de cien años de trayectoria como cuerpu d'élite n'operaciones de localización y rescate



n'espacios confinaos y “a la so participación n'operativos nacionales ya internacionales en situaciones de peligrú, principalmente en quemes, ambientes tóxicos y esplosivos”.

Constituyida fai más d'un sieglu como cuerpu profesional de salvamentu pa dar serviciu a les empreses mineres, la so esperiencia en rescates n'interior motivó la so participación en numberoses intervenciones n'accidentes y catástrofes naturales.

Anguaño, l'Asociación de Salvamentu en Mines, de la que forma parte la brigada, ta integrada pol Principáu, Orovalle, Grupu Minersa, Carbonar y el Grupu Hunosa, qu'apurre'l 90% del so presupuestu añal. L'equipu, que tien la so base nel pozu Fondón de Llangréu, ta compuestu por 18 persones: un director técticu, un xefe de brigada, un inxenieru técticu, un vixilante, trés conductores-salvadores y once brigadistes procedentes de los pozos d'Hunosa y con un mínimu de diez años d'esperiencia en mines.

El grupu ta especializáu en técniques de rescate n'espacios confinaos colos medios habituales utilizaos en minería, especialmente nel usu del equipu de respiración autónoma en circuitu zarráu. Anque'l so llabor como brigada de rescate centróse n'innúmerables accidentes mineros, el prestíu del equipu llevólu a intervenir n'emergencies tanto n'Asturies como n'otres comunidaes y nel estranxeru. La so actuación más recién, y la que volvió poner en valor la so profesionalidá, producióse en xineru, cuando foi riquida pa participar nel operativu de rescate del neñu Julen Roselló en Málaga.

Ente otros reconocimientos, la brigada recibió la Medaya d'Oru al Méritu nel Trabayu (1972), la Medaya de Plata del Principáu (1990), la Medaya de Plata de la Cruz Roja (2005), la Medaya d'Oru con distintivu azul al Méritu de la Protección Civil (2007) y la Medaya d'Oru d'Andalucía (2019).

- **Rosa Menéndez López**

El Conseyu de Gobiernu acordó conceder la Medaya d'Asturies, na so categoría de plata, a Rosa María Menéndez López, “pola so exemplar trayectoria, pol eleváu nivel qu'algamó en toles facetes vanceyaes al so oficiu de química y por ser la primer muyer que lidera'l mayor ente d'investigación d'España”.

Nacida en Cuideiru en 1956, Menéndez ye doctora en Química pola Universidá d'Uviéu y presidenta del Conseyu Superior d'Investigaciones Científiques (CSIC) dende payares de 2017. Ye la primer muyer qu'ocupa la presidencia d'esti organismu nos sos 80 años d'istoria. Dende 2003 hasta 2008 dirixió l'Institutu Nacional del Carbón (Incar),



onde s'especializó nos materiales de carbonu y nos procesos de conversión del carbón y los sos derivaos, y nos últimos años abrió una llinia d'investigación sobre'l grafenu con aplicaciones na biomedicina y nel almacenamientu d'enerxía.

A lo llargo de la so trayectoria realizó investigaciones na School of Enviromental and Mining Engineering (Reinu Uníu), nos departamentos d'Inxeniería Química del Imperial Collegue (Reinu Uníu) y de la Clemson University (Estaos Xuníos), nel departamentu de Xeoloxía de la Southern Illinois University (Estaos Xuníos) y nos llaboratorios Northern Carbon Research (Reinu Uníu). Otramiente, participó en más de 30 proyectos d'investigación a nivel autonómicu, nacional y européu; publicó más de 200 artículos en revistes internacionales d'altu impactu y cuenta con una decena de patentes.

Ente otros cargos, foi presidenta de la European Carbon Association y del Grupu Español del Carbón, coordinadora del Programa de Materiales y Enerxía, miembru del Comité Internacional del Carbón y Petroloxía Orgánica, de la Comisión Nacional d'Evaluación de l'Actividá Investigadora y del conseyu rector de l'Axencia Nacional d'Investigación.

• **María Jesús Rodríguez López**

L'Executivu estrema a María Jesús Rodríguez cola Medaya d'Asturies, na so categoría de plata, pol so singular y brillosu llabor artísticu y “pol talentu y la fuerza qu'entornó nuna obra que dialoga cola so esperiencia vital, siempre amestada a la creación dende l'interés intelectual”.

Rodríguez (Uviéu, 1959) realizó una apuesta constante pola esperimentación, por aciu l'usu d'elementos de la naturaleza y de materiales industriales actuales, principalmente cayuela y cartón, como base pa representar un universu conceptual de gran riqueza espresiva dende una astracción personal. Artista de los sentíos y l'esperiencia, considera los elementos naturales “capes d'istoria y de memoria”, con que los sos volumes xuega “pa intentar detener la mirada de la xente”.

La escultora formó parte del Grupu Abra, colectivu artísticu que marcó un finxu nes artes plástiques d'Asturies nos años 80 del pasáu sieglu. Formada na Escuela d'Artes Aplicaes d'Uviéu, dedicóse nos entamos de la so actividá creativa a la pintura, pa dir evolucionando pasu ente pasu escontra la escultura, na que desenvolvió'l so trabayu más esencial, pol que ta considerada un esponente de la cultura actual.

Los sos trabayos, que fueron reconocíos a nivel rexonal, nacional ya internacional, espunxéronse n'Asturies, n'otros llugares d'España y en galeríes de París, Zúrich, Lyon, Münster o Nueva York. Amás, tien obra pública n'Uviéu, Xixón, Avilés y A Veiga, y les sos creaciones esibiéronse na Feria FIAC de París y n'Arcu, en Madrid.

• **Rede de Cases d'Acoyida del Principáu**



La Rede de Cases d'Acoyida del Principáu recibe la Medaya d'Asturies, na so categoría de plata, como tributu “al so llabor p'apurir una atención urxente y permanente a les víctimes de violencia de xéneru y a les persones al so cargu”, col propóscitu de favorecer la so recuperación integral y facilitar el so regresu a una vida autónoma.

La so constitución arrincó nel añu 2000 cola redacción d'un conveniu marcu que sentó les bases pa l'atención a muyeres maltrataes y menores. La xestión encamentada a Cruz Roja y en 2002 yá se xuntaren los conceyos d'Uviéu, Xixón, Avilés y Valdés, darréu fueron incorporándose Castrillón, Llangréu, Llaviana y Samartín del Rei Aurelio. El 25 de marzu de 2007 punxóse en marcha'l Centru d'Atención Integral a Muyeres Víctimes de la Violencia de Xéneru, conocíu popularmente como Casa Malva, un equipamientu especializáu n'atención integral que se convirtió en cabecera de la rede.

Anguaño, nel Principáu funcionen trés cases d'acoyida y 20 pisos tutelaos pa un total de 80 unidaes familiares. L'oxetivu d'estos recursos ye favorecer la recuperación total de les víctimes de maltratu y la so atención ye altamente valorada: el 95% de les muyeres axudica la máxima puntuación l'asistencia recibida.

L'accesu a la rede realízase por aciu una llamada al teléfonu d'emergencies 112 o al traviés de les fuerces y cuerpos de seguridá, los servicios sociales, el sistema sanitariu, los centros asesores de la muyer y l'Institutu Asturianu de la Muyer. En 2018, emprestóse asistencia a 467 persones: 243 muyeres, 213 fíes y fíos y 11 persones a cargu.

Celebración del Día d'Asturies en Cabrales

El Conseyu de Gobiernu tamién decidió que los actos del Día d'Asturies se celebren esti añu nel conceyu de Cabrales.

Nuevu secretariu xeneral técticu

L'Executivu nomó güei secretariu xeneral técticu de la Consejería d'Infraestructures, Mediu Ambiente y Cambéu Climáticu a Francisco Javier Álvarez López (Uviéu, 1976). Llicenciáu en Derechu pola Universidá d'Uviéu, ye funcionariu de carrera del Cuerpu Superior d'Alministradores del Principáu. Dende 2011 ocupaba la xefatura del Serviciu d'Asuntos Xenerales de la Consejería de Desenvolvimientu Rural y Recursos Naturales y primeramente foi técticu del mesmu serviciu na Consejería de Mediu Rural y Pesca.

D'esta miente, rematen los nomamientos de les persones que van ocupar les secretaríes xenerales téctiques de toles consejeríes, un pasu que va



permitir avanzar na configuración de la nueva estructura de l'Alministración autonómica.